

A D E N



RABIAM triplicem historiographi statuunt, Petream, Desertam atque Foelicem. Huius Metropolis, caput & celeberrimum Emporium est A-DEN. De quo Lodouicus Romanus patritius lib. 2. nauigationis suæ Arabicæ, hunc in modum scribit: Hac vrbe non memini me vidisse munitiorem, in continenti præsertim haud inæqualis soli, geminum latus sepunt mœnia, quod superest montibus occluditur, inque eis quinque sunt arces, in solo æquali est vrbs, ambitu sex mille ædium contenta: commercia in nundinis noctu hora secunda ob nimios, qui sæuiunt interdiu, æstus exercent. Propè vrbem ad lapidis iactum mons est, inque eo arx sita est. Ad radices autem montis confidunt naues: vrbs profectò elegans est, & totius Foelicis Arabiæ urbium pulcherrima. Illo, ceu ad famigeratum emporiū, ex vtraque India, Aethiopia, ac Perside exercentes mercimonia, nauali itinere confluunt. Itidem agunt, qui ad Mecham frequentes contendunt: verum simul ac liburnicæ portum appulerint, adsunt præfecti vestigalium, percontantes vnde soluerint, quidue conuehant mercium, quantumque temporis sulcando maria absumpserint, & item quot homines singulæ celoces tulerint. His exploratis condicto malum, vela, & id genus armamenta asportant aliò, vt illinc abeundi haud persolutis vestigalibus exempta sit occasio appulsis. Hactenus ille. Dominus huius vrbis Sultanus, non nisi in Iunio, Iulio, & Augusto hic residere solet, ijs enim mensibus mercatorum adueniunt naues, quarum omnino nullæ, quin ex montium summitatibus conspiciantur transcurrere possunt. Est rara huic vrbi pluuia, & dulci destituitur aqua, quam ex continenti allatam, cisternis ad quotidianos vsus conseruant. Quantum ex situ ciuitatis conijcere possum, inquit Munsterus, hæc ipsa est, quam in Arabia Foelice Ptolemæus appellat Arabiam, aut Ocelim.

M O M B A Z A



MOMBAZA, Ptolemæo, Tonica, insulare oppidum, elegans ac nitidum in finibus Africæ. Quod Christiani anno reparatæ salutis 1505. vi occuparunt: cum enim Franciscus Dalmaida nauigaturus in Indiam, tributum ab oppidanis, Regis Lusitaniæ nomine exigeret, Afri verò armata manu tributum persolutionem recusarent, idcirco Christiani oppidum deuastantes, totum exusserunt. Rex triginta stipatus viris, fuga sibi consuluit, reliquis omnibus interemptis. Oppidum nunc ab Afrijs restauratum, & acerrimos Christianorum hostes habere dicitur.

Q V I L O A



QVILOA, Ptolemæo, Rapta, pulchra est in Africa ciuitas, in eiusdem nominis regno & insula posita, continenti vicina, Mahumeticæ sectæ regulum semper habuit, summum Christianorum inimicum. Ad hanc urbem cum Franciscus Dalmaida Anno Domini 1505. cum Lusitanica classe peruenisset, Regem ad se aduersari iussit, qui morbum simulans ad defensionem sese parauit. Itaque septingenti Lusitani, ad ciuitatis oppugnationem armantur, qui ciuitate deuicta, regeque in fugam conuerso, aliaque gubernationis administratione instituta, ciuitatem hanc Portugaliæ regi tributariam fecerunt. E regione insulam S. Laurentij habet.

C E F A L A



CEFALA Africæ insula, anno partæ salutis 1500. primùm est inuenta, cuius longitudo trium est miliarium, latitudo verò vnus. Pagos habet duos, in quibus domus nō pauca, & arx: Regi ciuitatis Quiloa quondam parebat, ceterum ab eo deficiens, peculiaris Regis appellatione gaudebat. Anno Domini 1505. arcem, quam Lusitani tenebant, vehementi obsidione incolæ oppugnarunt, adeò quidem, vt pertenuis euadendi spes Lusitanis appareret: qui noctu, præter Afrorum opinionem erumpentes, Regem, multosque proceres in cœnaculo suo opprimunt, eiusque caput hasta infixum per arcis fenestram exponunt, eaque ratione ingens euadunt periculum, & tandem alium Regis Portugaliæ nomine præfectum constituunt.